

## A CUDD'ALA 'E SU RIU

Est umbrosa sa terra  
a cudd'ala 'e su riu,  
e b'at zente in s'ispunda  
ch'est dimandande azudu.

A cust'ala su sole  
iscaldit e cunfortat  
s'ómine indifferente,  
distraidu,  
cun s'oriolu in mente  
de crescher sa ricchessa  
e su cumbéniu,  
bocchìndeche a isténiu  
sas isperas anzenas.

E dolent sas cadenas  
chi sos melmos istringhent  
e iscorzant,  
paris cun sa timòria  
chi sos ammentos morzant,  
e s'istòria isméntighet  
su dolu e sa passèntzia  
po una sufferèntzia  
chena 'essida.

Est àrrida sa terra  
a' cudd'ala 'e su riu  
e non bi creschet erba,  
ne fiores.  
Non s'intendent sas boghes  
de giogos de pitzinnos,  
ca si che faghent mannos  
chena mancu connoscher  
sos beranos.

Un'azudu lis mando,  
intessinde su filu  
de s'ispera  
iscritta in custu cantu de pabilu.